

De Kwakel

PRINS PAUL I
PRINSES ANA

**Maaktj uch
mèt die daag
neet drök,
't aevewicht
kuntj waal
weer trök.**



Vastelaovendj 2007



**BOEM PAAF,
WAE KNALLE
OPPE
VASTELAOVENDJ
AAF !!**


Jeugdprins Remko
Jeugdprinses Carolien

De Kwakel

PROKLAMATIE VAN PRINS PAUL I

Ich, Paul I, 56 ste prins vanne Moerebuuk, gebore en getoge in Èll, 6^e kindj van Miet vanne Bekker en Piet vanne Meister, getrouwdj mèt Ana Alcubilla oet Barcelona, dochter van Benito en Felisa, vader van Jordi de voetballer en Laura 't danseresje en amazone, 12½ jaor tösse de Muuzevangers van Mares gewoeëndj, mer alweer 10 jaor gelökkig trök in Èll, en woëen inne Pannestert, wirk bie Philips in Indjhoove as bookhaojer bie F&A Nederlandj, al jaore voetballer in 't 5dje en hób bie RKESV ouch ein bestuursfunctie, bèn fan van 't Nederlands Elftal en zeen verder gaer good voetbal, al is det ós MVV-ke, lid van Fanclub Barcelona Nederlandj ómdet FC Barcelona toch mien clubke is, as lid vanne Moerebuuk doon ich mien bèst veur 't Kwakelcomité, same mèt die van PETJE Plop optraejes gedaon oppe Bóntje Aovendje, oppe leste LiLiLi-daag in Remunj 2^e plaats gehoojdj mèt dialectsjrieve, haoj absoluut neet van stilzitte, dao kin se mich mèt straofe, pak dus regelmaotig de fiets of trék de wanjelsjoon aan, bèn gaer woëe de minse zeen, want doa vèltj altied get te aojhore, weit zeker det mien adjudante Ron en Geer mich good gaon helpe, same mèt heur vrouwe Jacqueline en Anny.

BIE DE GRATIE VANNE RAOD VAN ELF, LAOT ICH UCH 'T VOLGENDJE WETE



Weurdje van Prins Paul I

Ich mocht t'r destieds ein paar daag euver naodinke of ich 't woëj waere! Mer Ana mótt aan mien ouge gezeen hóbbe det ich 't veur michzelf al drek veur 100% zeker wist. Ich zagt dus 'jao' en veurzichtig hób ich Ana gevraagd om mien prinses te zeen. Zelf sting ze dao ieërst neet zoeëzieër op te wachte, mer ich bèn enorm trots det ze oeteindelik ouch óm waas en zoeëveul meugelik ane aktiviteite mèt geit doon.

De oetroping op 7 jannewari waas good inein gestoke door de hulptroepje. 'T moment des se den oeteindelik dao steist ... det is mèt gein pen te besjrieve. Allemaol die minse, 't geroop en geklap, de plichtpleginge en oeteindelik die spontane receptie... Geweldig!

Wae hóbbe ózze opstaeker gatj en det waas eine goje óm de vastelaovendj mèt in te gaon.

Alvast bedanktj minse as gae ós helptj óm die daag te doon slage.

Prins Paul I en Prinses Ana

De orde die dit jaor ónger mich is ingesteldj is:





Keul haoje.

Kirmis 2006. Geert Maessen steit 's möriges op en is ziene reem vanne bóks kwiet. Zeuke, zeuke en nog 'ns zeuke, mer niks te vinje. 's Aoves geit moder 't aete klaarmake en wiedet ze de keulkast ope duit óm get te pakke liktj dao netjes opgeroldj naeve de kieës juist ..., dae reem!
Toegegave .. Geert heet waal ins aaf en toe get aafkeuling nuëdig.



Brrrr... kaod!

Meuktj niks oet.



Jo Beurskens ging inne KVV-waek mèt de leiding van groep 3-4 nao de Griek. Nao de nuëdige pinte en 't lekkere aete kwaam ederein lekker los, zoeë ouch Jo. Hae begost te kalle euver Kelpe-kirmis maandjig; "Flink zoepe en spek en eier aete", waas zien plan. Jesper vroeg nog aan Jo of de baas dao op dinsdigmörge waal zoeë blie mèt zoj zeen. "Gaefe niks óm", zagt Jo, ".. as de baas mich döbbel zuut!"



Snelle tuinman

Zef vanne Slegter is de noewe tuinman vanne sjoëël. Hieël gemotiveerdj is hae op ein gegave moment de hék aan 't snoeje. Twieë van die klein menkes staon dao mèt de henj inne tes nao te kieke. Nao ein tiedje vreugtj ein van die menkes; "Bès tich de noewe tuinman?". "Jao," zeet Zef hieël trots, "wiezoeë det den?". "Jeh," zeet det menke, "de veurige tuinman kos det veul sneller!"
Noe wete wae neet of dae veurige echt veul sneller waas, of det Zef missijen te zieër aanne kal is gehaoje door die menkes waat allebei zoeëj kinne.



Det smook de hieële daag.

Mart Stienen ging op woensdig met 4 klein maedjes nao Roj veur te ballette. Mart hoofdje neet mèt te doen, mer móst rieje. Hae móst ein oor wachte dus ging d'r mer nao de mertj óm de tied get óm te kriege. Dao bestèdje hae zich eine vieëtnamese loempia en innegang nog ins 10 veur mèt te numme, veur thoes inne diepvries. Hae vergoot t'r allein bie te zègge det die 10 neet veur noe wore en kreeg dus 11 gebakke loempiaatjes. Zoeëdoondje heet t'r de hieële daag die dinger gaete. 't Zal 'm zien naas waal zeen oetgekómme.



advertentie



Wiltj gae d'r ouch ins op los drumme? Veur slaagwerkmuziek nao

ELCEE - Leon Camp

Boumwekerie Moors



Ouch veur eine kómplieëte tuinaanplantj.



Sjoeënheidsspecialiste

Jeanne v/d Hagen

As gae der nog knapper oet wiltj zeen.

Gaotj nao Eerkens of Profmarkt.nl



Dae levertj hang en sloetwerk en veul mieër artikele, goodkoup en snel.

't Loupendj veurke.



Loes van Palme haaj gezeen det bie Ien de zekeauto mèt sirene wègreej. Ze dacht zeker te wete det t'r get mèt Maan gebeurdj waas. Ze móst nog nao de slegter en nao de bekker en det dao alvast vertèltj want 't zaat heur neet lekker ... Thoes gekómme ging ze gauw Riet belle zoeëdet Ien d'r neet allein mèt zoeëj zitte. Mer Riet waas neet thoes dus ging Loes mer Pierre van Riet mobiel belle. Pierre kos Riet neet bereike want die waas sporte ane Iezere Man. Dus Pierre beltj dochter Tamara in Heytse. Die springtj mèt heur kindj inne auto óm Riet te hole. Mer toen Tamara bienao bie Riet waas kreeg ze te huëre det 't neet mieër nuëdig waas, Maan waas gewuën wirke. Inne zekeauto haaj Patrick de tummerman gelaegge. Hae waas inne buurt aan 't werk gewaestj en wie d'r zich duchtig inne henj haaj gezaegdj waas t'r bie Ien óm hulp gaon vraoge.



Wisj djer al ...

Oh ... Bès tich d'r ouch nog!

Bès se meug?



- o det Evert en Tiny op vekansie zeen gewaestj nao Texel
- o det se dao eine tandem geheurdj höbbe óm op rón dj te ketse
- o det Evert toen Tiny d'n hieële daag neet gezeen heet
- o det Griet van Maessen zagt det Jantje Deckers ein óngersjei-ing verdeentj
- o det Jantje al 50 jaor oppe zelfdje kruk zitj
- o det Richard Bours op 19-08-2006 eine gepaeperdje krachtterm gebroekdje
- o det hae zagt; "Veur mich is d'r mer eine heldj. En det bèn ich zelf !"
- o det de blome inne bloombek bie de kirk zoeë sjoëën in bluuj kinne staon
- o det Christa van Math uch oet kan lègge wie det kan
- o det Angelique van Fer waal ins nao de IKEA geit want ze vindj det ein sjoëën groeëte zaak
- o det ze waal drie kieër langs dezelfdje rèk luptj veurdet ze de oetgank vindj ...

nao boete

De Kwakel

advertentie

Gaotj d'r ins get dèkker op oet
Beveurbieëldj nao
De Bachelorclub
ofwaal
Bie Siem



HENDRIKX-VAN GEMERT



BESTRAOTINGE

censuur

Kinjer

Jur kreeg ein vraag vanne
therapeute; "Hebben jullie thuis
dieren?" "Jao," zeet Jur, "eine hóndj
dae rietj euver de manj en eine
kniên dae rietj euver de kippe."
"Daar heb ik niks van verstaan,"
zagt die therapeute. "En det is mer
good ouch," zeet Christa.



Leef Moeërebuuk,



Veurig jaor spraak ich de hoop oet det 't jubileumseizoen mocht oetgruje tot ein sjoëen muzikale compositie. Mèt groeëte tevrejaheid kan ich stèlle det det veur mieër as 100% gelóktj is. De vastelaovendj is ein echte "rapsody" gewore. Dit is ein muziekstók mèt deile die totaal versjillendj zeen mer same toch ein groeët gehieël vorme. Dink mer aan de "Bohemian Rapsody" van Queen. Eder deil vormtj ein hoeëgtepunt op zich. 'T ganse aafgeloupe seizoen ginge wae van waek tot waek van 't eine hoeëgtepuntj nao 't anger. Op 't inj van edere aovendj koste we weer ein good geslaagd evenement aafstrepe. De vasteloavesdaag zelf wore de groeëte finale mèt daonao dinsdignacht nog eine echte "coda". Moeërebuuk, 't waas ein ieër en genot óm uch daobie as prins te moge veurgaon. Groeëte dank aan mien adjudante, de thoesfronte, jeugdprins Mitch en jeugdprinses Jolien, de raad van 11, alle comité's, alle deilnummers aan activiteite, alle muzikante en alle Moeërebuuk en ouch minse van boete Èll veur de steun, de hertverwerwendje reacties of ómdet gae der gewuën bie woordj. Ein speciaal woord van dank aan Vorst Jan:

Achteraaf bliektj dèt ich de lèste prins bèn dae "ónger" dich heet geregeerdj. As klein menke hób se mich al weegwies gemaaktj inne vastelaovendj en tot en mèt 't aangeloupe seizoen bèn ich figuurlik aan dien handj mètgeloupe óm 't

"vastelaovesvak" enne leefdje
daoveur ónger de knie te kriege.

'T examé waas aafgeloupe jaor, ich
hoop det ich geslaagd bèn.

55 kieër dank veur alles!!

Tot slot wil ich miene opvolger veul
succes winse in ein óngetwiefeldj
geweldig noe seizoen mèt mien
motto: Vreug of laat krieg ich
geliek, mèt muziek veul se dich
riek!

Prins Fer I

55° prins vanne Moerebuuk



Opnoew beginne.



Jolanda en Wil hóbbe veurig jaor 'De Hazelaar' veur de naas van ein paar
gegadigdje wèggekoctj. Fannetiek waerdje 't opknappe aangepaktj en ein paar
maondj lank zeen ze flink aan 't poejakke gewaestj. Oeteindelik waas allein de
graasj nog euver, dao haaj zich in dae tied eine stapel rómmeel gevormdj dae
danig inne weeg begós te ligge. Op eine zaoterdigmörge waerdje dae rómmeel

den mer ins aafgeveurdj. Det vertèldje Jolanda wie det
se vlak veure middig efkes bie Elly waas, want dao
waas se al eine daag neet mieër gewaestj. "En waat
geis se desmiddig doon?," vreugtj Elly. "Jeh," zeet
Jolanda, "wae hóbbe noe weer plaats inne graasj, dus
gaon wae mer innegang dae eine kast weer opbouwe."
Toen Elly 's middes heur runtje door 't dörp haaj
gemaaktj ging ze ouch mer efkes bie Jolanda en Wil
langs. Wie ze ane graasjdeur kwaam huërdje ze die
twieë hel-op zich dinger aafvraoge. "Wie kan det noe?"

"Volges mich is det dink sjeifgetrokke vanne vocht" "Mós se kieke op hoeveul
plaatse die sjotte gape" "Waat is toch gebeurtj mèt dae lómmeel?" En det ging
zoeë mer door. Elly haaj óngertósse oppe deur gekloptj en waas binne gelaote.
Ze huërdje zich det ins aan en bekeek zich dae sjeive kast ins tegooj dae die
twieë inein geknutseltj haje. Toen Jolanda de deurkes toe probeerdje te doon
sjoot Elly inne lach en kost de ieëste tied niks mieër zègge van 't lache. Waat ze
zaag waas det de sleuj van de deurkes BOVE de deurknup zote. Det kan alvast
noeëts! En zoeë bleek det ze nog mieër óngerdeile ómgedreidj haje, logisch det
't eine sjeive tispel waas gewore.

Oeëts mós se opnoew beginne, det kan zeen mèt örges anges gaon woëne,
mer zeker ouch mèt kaste bouwe



Kinjer

Tijn is jaorig en die heet waal ins de
gewuëndje óm inne tuin te poepe.
"Nae," zeet Ron, "Tijn duit det neet
mieër op heure verjaordaag, die
heet desmörge al gepoeptj" Effe
later steit Tijn mèt groeëte ouge en
mèt broen aan heur vingers bie pap.
Det kos nateurlik neet misse!

advertentie



mook
motoróngerdeile

Praktijk veur
Klassieke Homeopathie
bie Dianne Lamers



As gae op ein anger
meneer gezóndj wiltj waere

advertentie

SLAGERIJ RUUD EN MARLEEN HEIJKERS



Vers vleis
Kantj-en-klaor gerechte
Barbecues
En nog veul mieër

LAST VANNE VEUT ?

Den snel nao pedicure
Toos Mennen



Wie laat?



Monique Gerris beldje ein rundje names POP-Ell óm minse achter de bónne te regele. Ze haaj nog minse nuédig veur 't lèste tiedstip vanne aovendj, van 23.00 tot 1.00 oor 's nachs. Dao beldje ze Mariëlle Beurskens veur mèt de vraog: "Mariëlle, kins tich achter de bónne zitte van 11 tot 1? Mariëlle stóm verbaasdj vreugtj: "Begintj det al 's mörges den?"



Kinjer

Ruud, zoon van Fer en Angelique, speeltj neet gaer boete, en zitj lever veur de televisie, surftj euver 't internet of speeltj mèt de gameboy. Streng aojers wille toch det ze minimaal zoeëveul tied boete speule. Dus det ouch aan Ruud oetgelagd, woeë-op Ruud vreugtj: "As ich de voelnis boete zèt, teltj det den ouch as boete speule?"

Speul mer mèt mich jungske.



Wisj djer al ... (ein rundje bekker)

- o det 't veur Thijs en Francien ein hieël verassing waas det de buurt mèt leep inne optocht as bekker
- o det ze op maondjgmörge 't motto te huëre en de kleier pas te zien kregte
- o det de keukskes die waerdje rónjdgedeild dus neet van Thijs wore en det waas te preuve
- o det Thijs vanne groep ein sjoëen foto woeëj veur in 't vakblaad en of det gebeurtj is wètj gein mins
- o det ein dink zeker is; Thijs heet genote
- o det t'r ein aktie waas bie de bekker mèt ein kraskaart
- o det Francien det eine klantj hieël snel oet lèktj door zelf al beginne te krasse
- o det eine mins mèt zien volle verstandj daonao keek en zag; "Francien, waat bès se noe aan 't doon?"
- o det Francien zag; "Dich höbs geine pries, ich höb al veur dich gekrastj, anges meuk ze d'r toch mer eine rómme van hie oppe toeënbank!"
- o det dae mins betaaldje en nog ins achteróm keek en dacht; "Höb ich det waal good gezeen? Die Francien toch!"
- o det Francien wètj waat alle manne van Èll lekker vinje?
- o det det veur de gevöldje bruédjes geldj !
- o det ze nao kouwzunjig ginge, de kinjer al haje óngergebrachtj, mer det de winkels neet ope wore?
- o det ze waal ein vol parkieërplaats aantroffe, mer det die minse neet aan 't stadte wore, mer veur de intocht van Sinterklaos kwome.
- o det Cor Fermans bie de bekker ein wit mikske bestèldje
- o det ze toen mèt 3 man persenieël tegeliek repe; "Nae Cor, det bestèls dich noeëts !"



Zeen dees dames

- A Óm in te lieste?
- B Nao eine aoje optocht aan 't kieke?
- C Vastelaovendj aan 't vere?
- D Kaoj aan 't lieje?

advertentie

Zeuktj gae ein struukske, ein buimke of ein plentje veur inne tuin of achter de lamelle



Den mójt gae zeker ins bie Linders aanbelle

advertentie

Veur good tummerwerk meuktj
Koos Winkelmolen
zich sterk



advertentie

Veur appele en paere
Gaojt nao Koppen-Moors



vers vanne boum



1e priës euver alles (wisselbeker)
en ouch

1e priës wages
mèt 148,5 puntje.

"Fer op zieë of ane kantj,
wae knalle door 't Moeërelandj."
van; FV De Brandjblussers




2e priës mèt 130,5 puntje : "Boeve / Politie"
van ; De Prutsers

3e priës mèt 124 puntje : "Mèt dees daag geine stress"
van ; VV de Zijvermutse

Oetsleeg Vastelaovesoptocht 2006 van CV De Moerebuuk

1e priës klein groepe
mèt 126,5 puntje.
"5x11 Wae wille 't veur gein
goud misse"
van; Golden Girls



2e priës mèt 122,5 puntje : "Bloem Koolen"
van ; Luuk en Sjors

3e priës mèt 117 puntje : "Zeiver Moel"
van ; Kepper



1e priës groeëte groepe
mèt 132,5 puntje.

"Fer heet geliêk, mèt muziek
veul se dich riêk"


van ; 7 Groeëte en ein piep



2e priës mèt 129 puntje : "Mèt de Beste Bakker oet" van ; buurt Pannestert
3e priës mèt 124 puntje : "5x11 Wae zeen d'r gekniptj ..." van ; Boetegewoeën



1e priës alleingangers
mèt 124,5 puntje
"Wae duike same de koffer in"
door Jos Janssen



2e priës mèt 120 puntje : "Ich kóm neet ane bak"
door Hub Willekens

3e priës mèt 119 puntje : "De vors"
door Marjo Beeren



Mer niks ane hèk!

Carla en Ed krece in 't veurjoar eine noewe hóndj, zón klein óngerdeurke. Veurjoar is ouch de tied vanne hèk sjaere. Op eine goje zaoterdig begoof Ed zich hie aan. Hae waas zoeë drök ane gang det t'r neet inne gate haaj det 't hundje erg noesjieërig waas en met zien naas inne hèk zaat. Hae knipdje zoeë hel det t'r de naas van 't hundje mètknipdje.



Det is ein gooj sjeëer baas!



Good oetgeslaope.

Eine houp van die jóng bie Siem, en Siem nateurlijk ouch, ginge op stap in Indjhoove, hieël verstenjig mèt ein taxibös van Jac de Lieëw. De hieële aovendj good gezope en mèt ein flink stök in heur hakke trök nao Èll. Ederein stadjje oet en ging heives. Wie dae chauffeur in Ospel aan kwaam dacht hae 'ich controleer de bös nog effe.' Tot zien verbazing vónj d'r eine slaopendje klantj. Alex waerdje wakker gemaaktj en dacht "ich gaon toch neet weer eine taxi betale," en beldje Maud midde inne nacht óm hum te kómme hole. Ze heet hum gehoordj, mer hieël blie waas ze d'r neet mèt.



Ein mupke.




In 't Steine Tiedperk kumptj ein menke trök vanne sjoëel. "Pap, ich höb vandaag mien rapport gekrege," zegt t'r, en hae gaaf zien tegelke aan pap. Dao stónge 3 ciefers mèt tekst op gegraveerdj en pap begost hel-op veur te laeze. "Vèsse ein 5 : hèldj de gaert nog get zieër in 't midde vast." "Jage ein 5 : dórftj de bieëste nog neet aaf te make" "Geschiedenis ... ouch ein ónvoldoende veur geschiedenis !?" vreugtj vader aan det menke. "Mer, mer jungske ... Ein ónvoldoende veur vèsse en jage, det kan ich begriep, doe bèst noch jónk. Mer wie kin se noe ein ónvoldoende höbbe veur geschiedenis? ...dae is nog mer net begónne !"



Kinjer

Marlies ging met heur kinjer nao de tandarts óm 't gebit te laote controlere. Bie Yvette zaag 't d'r good oet en bie Nadine zegt de tandarts det 't warsjenlik op termien eine beugel zoj mótte drage. Thoos gekómme zeet Yvette tege Marlies; "Mama, ich vinj 't neet ieërluk, ós

Nadine heet al eine bril en noe kriegtj ze ouch nog eine beugel, en ich höb niks!" "Och," zeet Marlies, "stil mer, dich höbs missijen dyslexie ..."



Weurdje van Groeët-vorst Jan



Indj 1981 begós ich as vorst. Dao waas toen allein eine Raod van 11 met prins en vorst. De prins waerdje toen nog oet de Raod van 11 gekoze. Dus allein degene dae nog neet prins waas gewaestj, kos prins waere. 't Raoje waas toen neet zoeë spannendj. Toch waas 't ein verrassing det ich in 1982 ieërst nog prins bèn gewore. Theike Rutjens en Jo van Bekkers Sjeng wore toen de eigelikke kandidate.

Ein vereeniging met veurzitter en secretaris waas det toen nog neet. Det kwaam pas in 1991. Noe, 25 jaor later, zuut 't d'r hieël anges oet. Wae höbbe ein groeëte vereeniging, wae höbbe ein hieël serie zeer actieve comités, wae höbbe eine Raod van 11 dae al jaors met geweldjige inzet veurop geit, en veural, wae höbbe ein dörp det vol euvergave aan ós activiteite met duit.




Tösse 't plezeer van toen ...

Det zeen twieë foto's met eine tössetied van 25 jaor. Ein versjil van daag en nacht. Ich bèn bliej, ich bèn gruëts op waat wae haje en waat wae noe höbbe.

Die 25 jaor höb ich mèt veurop moge loupe, as vorst en as veurzitter. Det höb ich óndanks de probleme die d'r zeen gewaestj, en altied zulle zeen, gaer gedaon. Ich dank alle minse die mich 't vertroewe höbbe gegaeve die funktie te kónne oetveure. Ich dank alle Moeërebuuk en anger vastelaovesveerders veur de steun en de mètwirking. 't Is good zoeë. Ich vinj det ich oppe tied plaats mótt make veur jóngere, aankómmandje talente. En van die talente, dao höbbe wae d'r in Èll zat van.

Ich wins de vereeniging, ich wins alle Moeërebuuk van Èll en van boete Èll nog hieël vól sukses en hoop uch nog dèk te moge treffe bie ós activiteite. Minse bedanktj!

Groeët-vorst Jan



**Veur al die jaore,
names alle Moeërebuuk:
Jan bedanktj !**



... en noe,
ligge veul jaore.

advertentie

Gaotj d'r ins get dèkker op oet
Beveurbieëldj nao
De Prairie
ofwaal
Bie Paul en Marlies



advertentie

BOEFIE

Dé specialist
in kinjerkleier



advertentie

Vrachtwages blinke
weer nao ein
bezeukske
aan;




TANK & TRUCK
CLEANING WEERT



Waat gaon wae noe kriege?



- A Johan en Gemma beginne zich hieël erg te sjame
B Dae kunsteneër Christo is hie ane gang gewaestj
C 'T hoës weurdj cadeau gedaon aan eine
D Ze hōbbe mer alles toe gemaaktj want 't trèkdje get veul



Jeugdwerk-kamp.

Dit jaor ging 't jeugdwerk richting 't zuije. 't Waas ein leuke kampplaats mèt ein aojerwèts gebouw en genóg plaats veur de tente nieër te zètte. Nao twee nachte inne tent en in 't gebouw geslaope te hōbbe weurdj Huub S. 's mōrges as ièerste wakker en kwaam tot de óndèkking det ziene fiets wèg waas. Och ... in ièerste instantie weurdj gedacht aan ein grap vanne leiding of vanne jeugdleje. Mer nao ein tiedje bleek toch det dae fiets écht wèg waas en ouch nog video- en foto-apparatuur, ein kniép en geldj. Dao waerdje beslote óm toch door te gaon mèt 't programma enne kampbeheerder waerdje ingelichtj euver de inbraak. D'r stóng zwumme op 't programma en aangekóme bie 't zwumbad waerdje 't toch nog gezellig. Behalve veur Huub, dae goeëdje de autodeur toe en jaowaal ... mèt de sleutels nog in 't kontaktsloot. De Belzje wegewacht waerdje gebeldj en nao 't betale van ein flinke raekening waerdje de auto in ein wip geopendj. (Det haaj Mart van Stiene ouch gekostj, mer dae waas al trök in Èll). Toen ze aan 't zwumme wore woeëj de leiding get nuttige inne snackbar en kwome toen pas écht tot de óndèkking waat t'r gebeurdj waas. Bie veul vanne leiding zaat t'r zelfs gein geldj mieër inne portemonnee. 'T waerdje nog ingewikkeldjer toen nao trökkieër oppe kampplaats de gendarmerie arriveerdje en rapport opmaakdje. 'T leek waal ein in scène gezatte tafereel. Gelökkig waerdje nao ein paar waeke door dezelfde gendarmerie gemeldj det de fiets en anger gestole spulle terecht wore, behalve 't geldj. Nou ja ... toch nog indj good al good!



Det móst toe!

Huub van Luute móst ein noe ruutje hōbbe. Hae ging dao mèt nao Buys in Rooij óm, leefst drek, ein noe exemplaar mèt te numme.

'T waas ein ruutje veur inne stoof en det móst gemaaktj. Huub haaj 't kaod want zoë eine strenge zomer haaj hae lang neet gatj ('t waas 1 juni, mer inderdaad kaod en naat).



Eine Braobenjer.

Math van Beurskens haaj de zomer ein paar daag eine noewe maat oet Braobantj woeë d'r eine klus mèt mós aafmake. Op ein gegaeve moment waas 't sjaft en zote ze inne kieët. Zeet Math in eine kieër: "Miljaar waat zitte hiej ein mögge!" Dae Braobenjer begreep det waal neet good en zeet toen: "Witte wah erger is dan mugge? ... Nie mugge!"



advertentie

Veur ein plentje veur inne mooshoof of ein bleumke oppe tied.
Nao Verhaag haer is neet wiët.



advertentie

LAST VANNE VEUT ?


Den snel nao
pedicure Bep
van Oosterhout-Tobben



advertentie

Eiltaria

gewuën de lekkerste friet en snacks
ouch veur complieëte sjóttels





Den nog mer ins trök gegange.

Marleen ter Tholen ging eine kieër nao Indjhove winkele. Alles ging op 't lêste moment en dao môst snel ein kaertje gekochtj waere aan det apparaat inne stationshal. Marleen haaj gein gedöldj en door 't hieële geduu op versjillendje knup kwaam d'r neet ein, mer veer kaertjes retour Indjhove oetrolle. Ômdet zón apparaat gein kaertjes die teveul geprintj zeen trök paktj, stóng ze dao mèt heur kaertjes. Laot neet raoje waat det kostj. Mer ze haaj haost, dus rendje ze nao 't perron en spróng mèt alle kaertjes inne trein. Inne trein waas tied óm nao te



dinke en ze bedacht det ze in Indjhove waal ein loket (mèt juffrouw) zoj vinje die de kaertjes trök paktje. Zoeë gedacht, ouch zoeë gedaon en effe later stóng ze in Indjhove tege ein loketjuffrouw oet te lègge det ze écht neet mèt veer persoeëne nao Indjhove is gekómme en det ze écht allein gereisdj haaj. De juffrouw streek euver heur hert en naam twieë kaertjes trök. Mèt det anger kaertje is ze verplichtj nog mer eine daag gaon winkele.

advertentie

Veur vrachtwages die ein noew
gezicht wille hóbbe



truck color design

ouch al stèit met dees daag alles oppe kop
miene service stèit altied veurop

Hub van Lunte
Tenieëltechniek

Kinjer

Vera vertèltj tege oma Mia det ze 't zelfdje wiltj as Josje van Stiene. As ieërste bedoeltj ze de raoze glitternegellak. "Oké," zeet Corine, "dae koup ich waal veur dich inne stad." "Jao mer," zeet Vera, "ich wil ouch 't zelfdje waat Josje oppe naas heet." Corine en Mia zègge allebei, "ze bedoeltj natuurlijk de sproetel!" Mer det bedoeldje Vera neet, ze bedoeldje det glimmendje oppe naas van Josje. Dus 'zweitdröppels' môst Corine ouch mer koupe inne stad.



Welk vèt?

Loes van Palme leep op 't volleybaltoernooi mèt ein spaghetti-humpke rón dj en enorm broen sjouwers. Naovraag leverdje 't volgendje op. Óm zoeë broen te waere môsse dich insmere mèt kamieëlevèt. (Kin se kriege bie de drogist). Noe vraoge wae ós aaf: wannieër kómme de böltje????



Twieë kieër

Begin november geit de Alzheimer stichting langs de deur mèt de collectebös. Op maondjig gaon ze rón dj oppe Magnoliastraat en hole flink get op. Op dinsdig geit weer de bel en Loïs van Anneke en Leon Camp duit ope. "Paaaap, kóm ins effe, dao weurdj geldj gevraagd." Op 't moment det Leon nao de deur löptj, geit ouch bie Margo de veurdeur ope. Allebei kieke ze verbaasdj op "Alweer?? Gister wore ze ouch al aan de deur!! Weem heet hie last van Alzheimer???", vroege ze zich aaf in koeër.



Nate gast.

De tennisclub heet eder jaor ein tenniskamp, zoeë ouch dit jaor. Eine aovendj haje ze eine Mystery Gast oetgenuëdj. 'T raengeldje dae aovendj en de kinjer zote allemaol binne in 't gebou te wachte oppe Mystery Gast. Boete leep dae Mystery Gast, verkleidj as suldaot en ónherkinbaar veur de kinjer, op en nieër te marchere. Nel van Koos



van Sentjens vónj 't zielig, zoeë eine suldaot inne raengel en zagt: "Zulle we Thijs mer binne




Nelly,
maag ich noe binne ?

Blieve belle.



Hans van Heber heet ein mobieltje. Hae is allein nog neet gewindj óm d'r mèt óm te gaon. Op zón toestel zitj meestal ein blokkering veur de toetse, mer Hans heet det nog neet zoeë oetgevónje. 'T mobieltje geit meestal mèt inne bookse-tes, mer door de beweginge die Hans maaktj, geit de telefoon ziene gank en beltj allerlei minse op, zónger det Hans det wètj. Meistal Ali (lid vanne voetbalclub), dae steit as ieërste in zien mobieltje geprogrammeerdj. Hae heet al in Frankriek eine kwaoje Ali aan de lien gatj ómdet hae hum steeds lestig veel mèt belle!!! Hans waas zich helaas van gein kwaod bewustj. Hae besloot waal óm Ali in ziene telefoon bie de Z te plaatse. Op eine aovendj stóng Hans thoes inne keuke en begós inins zien bookse-tes weer te kalle. Weer waas Ali ane lien ...




advertentie

VEUR ALLE VERZEKERINGEN


NAO
LEON KNAPEN

OUCH VEUR
EURE HYPOTHEEK



advertentie


Hóbtj gae last van eur spiere inne bein of nek. Den is Beekman-Verleg de juuste plek.



advertentie



Höbtj gae noew sjoon nuëdig,
en wètj gae neet woeë
te hole ?



Den probeertj ins bie De Schoenenhal
van familie Coolen

Gae wiltj get speciale decoratie,
appaart sjilderwerk of waat den och?
En gae wètj neet woeë haer?



Carien Huijskens
adviseerdj uch gaer.

PAND 17



Kinjer

Christianne en Maarten zeen pas
getrouwdj. 'T dochtertje van
Maarten, Britt, is dao
natuurlijk bie aanwezig.
Nao ein tiedje vreugdij
Dionne van Ard:
"mamma, wannieër
gaon wae trouwe?"
Woeë-op Angelique
zeet: "wae zeen al
getrouwdj." Dionne
weer: "dao weit ich niks
mieër van."



Ein fieëst.

Eder jaor organizere de minse die mètgeholpe höbbe aanne Èller vastelaovendj ein fieëst veur zichzelf. Veurig jaor is dit same mèt de Leedjesaovendj gedaon vanwege 't 55-jaorig Jubileum vanne Moerebuuk. Mer noe dus weer eine aovendj veur heur eige, en waat zaat det weer sjoëen inein. Frank Stals opendje de aovendj names 't Fieëst Aovendj Comité (FAC) mèt 't bericht det prins Fer en vorst Jan eder ein vaat deje en det waerdje nateurlik mèt gejuich óntvange. Zeker toen och nog bleek det ze bie de Prairie allewiel vate van 1000 liter höbbe! 'T FAC haaj hulp gekrege vanne Kaolderbend en ónger leiding van prins Fer en Ed Heijkers waas get inein geknutseldj mèt as thema 'muziek en dans', wie kan 't anges! Vreug oppe aovendj waas 't verzamele en waas t'r get oetlèk euver waat zoeëj gaon gebeure. De aanwezede móste groepe vorme van ein man of tieën en waerdje 't dörp ingestuurdj (bie eine thoes of op straat blieve zitte mocht och) mèt ein envelop mèt opdracht en CD. Op die CD sting ein leedje en dao móst eine dans of anger act bie verzónne waere.

Vervolges móste die dansjes en acts opgeveurdj waere as ederein trök waas inne café. "Wae wille oppe tied beginne dus veur tieën oor trök zeen!" begoste ze te dreige, "want anges kriegtj gae drek puntje aaftrèk." (Mer det waas 'ein ope deur' want tege emes zègge det t'r op tied trok mót zeen inne café ...) En inderdaad, óm tieën oor waas ederein trök en waerdje begostj. Fer en Ed deje de presentatie en 't foute cómmentaar gaeve. De rest vanne Kaolderbend deej jurere. Det deje ze zoeë good det ze nog tied euver haje óm get zitte te kaarte en nao de muziek te loestere. Det straoldje echt oet det alles hieël ieërlík verleep en daodoor deje alle groepe heur stinkendje bèst. Wae höbbe dansjes gezeen die se oppe televisie nog neet ins zuust en dao reje zelfs moters door 't café. Zeldzaam orgineel en van hoeëge kwaliteit waas alles waat gebrachtj waerdje. En det mèt amper twee eurkes veurbereijing! Dao kwaam oeteindelik eine winnaar oet de bös mer det waas biezaak. 'T belangriekste waas det de échte vastelaovesveerders weer eine sjoëne aovendj höbbe gatj veur heur eige!



advertentie



Emiel Custers goof in november ein rechtstreeks interview aan Sander Kleikers van L1 sport vanoet de café bie Siem. Eine groeëte satelietwage sting veur de deur óm de straolverbinjing tot standj te bringe. As Siem die van L1 noe haaj vertèldj det ziene buurman ein veul groeëter sjóttel in ziene achtertuin heet staon haje ze zich die meute kinne bespare. 'T zal Siem waal óm de foto te doen zeen gewaesdj.

EINE
KAMPIOEN

De mik, de bruedjes, de vlaai,
alles is dao zoeë lekker

Nateurlik bie Thijs,
ózze werme bekker



Kriegtj gae ónverwachs
bezoek oet allerlei heuk?

Lemmenhof

kampere en logere,
bringtj oetkómst

Ein sjoëen sjilderieke veur
uchzelf of emes anges



Gaotj ins langs bie
Peter Hermans

KUNSTSJILDER

De Kwakel

Wisj djer al ...

- o det De Lentekrans van naam verangertj is
- o det die noe De Lemmekrans heite
- o det Hanneke en Linda in Wieërt de parkieërgraasj woeëje oetrieje
- o det det neet ging want dao sting nog eine auto veur heur en dae haaj gein kaartje.
- o det dae mins van dae auto eine ingelsman waas en d'r niks van snapdje
- o det Hanneke toen ein kaartje ging hole veur dae mins en wie ze toen zelf woeëje oetrieje heure tied ómwaas en ze weer ein noew kaartje móst hole
- o det BEM hieëlemaal neet beteikendj 'Bureau Eerlijke Mededinging'
- o det det beteikendj 'Beter Eten bij Marlies'
- o det Sjeng vanne Bekker ein sjoëen oetnuëjiging haaj laote make vanwege zien verjaardaagsfieest (85-jaor)
- o det t'r zich aafvroog weem dae aoje mins op die foto waas



Èll oppe kaart.

Inne loup vanne tied zeen d'r genóg minse oet Moeërelanj die Èll op ein positieve meneer oppe kaart hóbbe gezatte. Dao moge wae gruëts op zeen. Veur de toeriste die den waal ins wille wete woeë Èll liktj is t'r ein beweegwiezeringsbord aangepastj. Mèt dank aan 't ANWB (Allerminst Neettebang Waornummendj Bujelskindj)



advertentie

advertentie

Is t'r get neet in orde met eur kat of eure hóndj Snel nao de dierenkliniek want dao make ze die weer gezóndj



Höbtj gae geine taleknóbbel

Custers
Taaladviezen
heet dae waal

SPAR - Leon Derksen

Veur alle
dagelike
boeëdsjappe




Veur al eur loeënwark,
snel, good en neet deur



Dao hóbbe wae Harrie v/d Looy toch veur

Ein mupke


Eine mins beldje aan bie ziene hoesarts en zeet: "Dokter, ich dink det ich ein mot bèn." "Den mótg gae neet bie mich zeen, mer bie eine psycholoog," antjwoordje dae hoesarts. "Det weit ich," zeet dae man, "mer ich kwaam toevallig veurbie en 't leecht brandje hie ..."



CV De Moerebuuk Programma Vastelaovendj 2007

Sjriefftj dit mer alvast oppe klender.
Veur wie laat en zoeë mótg gae 't Kontaktblad, etc. inne gate haoje.
Aaf en toe ins kieke op WWW.MOEREBUUK.NL kan ouch gein kwaod.

Zaoterdig	20 jan. :	Receptie noewe Prins Moerebuuk
Dinsdig	23 jan. :	Oefene Bóntje Aovendj
Dónderdig	25 jan. :	Oefene Bóntje Aovendj
Zunjig	28 jan. :	Kaartverkoup Bóntje Aovend
Maondjig	29 jan. :	Oefene Bóntje Aovendj
Dinsdig	30 jan. :	Oefene Bóntje Aovendj
Dónderdig	1 feb. :	Generale repetitie Bóntje Aovendj
Vriedig	2 feb. :	Bóntje Aovendj
Zaoterdig	3 feb. :	Bóntje Aovendj
Zunjig	4 feb.:	Senioremiddig
Vriedig	9 feb.:	80+ middig Bachelorclub
Vriedig	16 feb.:	Sjoëelcarnaval
Dónderdig	15 feb.:	Jeugdsleuteleuverdracht
Vriedig	16 feb.:	Sleuteleuverdracht
Zaoterdig	17 feb.:	Optochtnummers aafhole Bachelorclub (14:00 - 16:00 oor)
Zunjig	18 feb. :	Heilige Mès
Zunjig	18 feb. :	Vastelaovendj zunjig mèt chipsbal en aovendjactiviteit
Maondjig	19 feb. :	Vastelaovendj maondjig = OPTOCHT en priesoetrekking
Dinsdig	20 feb. :	Vastelaovendj dinsdig = KINJEROPTOCHT en ... sloete !



Kinjer

Josje liktj naeve mam in bèd. Inins vreugtj ze; "Mam, kriegs dich nog eine baby?" Rianne antwoordj verbaasdj det det neet 't geval is, woeë-op Josje weer slum opmerktj; "woeërom hób se den nog tietje?"

Wèt se det zeker ?

Jao

Ein mupke.

"Twieë van ós kippe lègge neet mieër," zagt eine mins tege zien vrouw. "Wie wèts dich det?," vreugtj zien vrouw. Zeet dae mins toen hieël druëg; "Ich hób t'r net euver haer gereje."



De Kwakel



Zeuk de 11 versjille !

Kinjer

Ana en Paul stónge mèt de jas aan, klaor óm wèg te gaon. Reuptj Paul nog ièerst nao de kinjer: "Wae gaon effe nao de zaal haer óm te stumme." Sjenbaar hóbbe de kinjer inne verkezingstied oppe sjoeel vanalles oetgelagdj gekrege euver de politiek want innegang kwaam Laura oet de hoeskamer gevloge. "Papa en mama .. stum oppe 'Partij voor de Dieren' .. please .. please .. die kriege al zoeë weinig stumme en wae hóbbe zelf twieë bieëste !" Wae wete neet of Ana en Paul van gedachte zeen verangerdj door dit pleidooi, euvertugendj waas 't waal.



Ein groeëte vèsker.

Theike van Rutjes ging ein kèr make veur Rick die hae nuëdig haaj veur te vèsse. Toen hae klaor waas woeëj d'r ze boete zètte mer waat bleek, de kèr waas breier den de deur. Theike vertèldje dit inne kantine en dao waerdje nog ins hertelik óm gelache. Toen keek t'r ièerst effe roondj en zag; "Gelökkig nemes vanne Kwakel hie ...!" Jeh Theike, det waas al teveul gezagdj.



Ein mupke

Jan: "Henk, sins wannieër hóbbs tich ein trombone?"
Henk: "Ich hób hum gelieëndj van det menke vanne bure."
Jan: "Ich wist neet des tich trombone kost speule."
Henk: "Kan ich ouch neet. Mer det jóng vanne bure ouch neet mieër!"



advertentie

STERK IN STAOL

XX

DERCKX STAOLBOUW

Sjoeënhedsspecialiste

Mariet van Enckevort-Janssen

As gae der nog knapper oet wiltj zeen.



LAST VANNE VEUT ?

Den snel nao pedicure



Hennie Heijkers

Wisj djer al ...

- o det Luuk van Paul vanne Sjilder de beteikenis van Paose good wist oet te lègge
- o det goje vriedig is óm Jezus aan 't kruus te negele en op blauwe maandjig is hae weer opgestange.
- o det Pietje van Nol jaorig waas en det Jean dao óm half twieë 's nachs aan dacht toen Pietje zag; "Mörgevreug wil ich waal ontbijt op béd "
- o det Nel van Bèr mèt de Bóntje Aovendj d'r drek achter waas det de Eutjes nummerke 36 ómgredidj haje.
- o det t'r minse in Èll zeen die ein alarm inne brebebös hóbbe.
- o det as se de gezèt bringe, binne ein lempke geit branje
- o det ze det alarm hóbbe gemaaktj naodet ze drie kieër veur niks nao de brebebös wore geloupe.
- o det José van Beurskes bie edere bocht ein raar geluid inne auto haaj en neet mieër wiejer dörfdje te rieje.
- o det Thei sangerdaags mèt dae auto nao zien werk ging en d'r al gauw achter kwaam det t'r ein losse rol aluminiumfolie in laag.



93

"Nae Drina .. zès - en - der - tig



Vereinigingsgebouwe gemeindje Hunsel.

Noch neet zoeëlang geleje haje ze inne gemeindje ein bureau ingeheid det môtst probere om alle verenigingsgebouwe die onger de gemeindje valle, zoeë-as voetbalaccommodaties en zale, hieëlemaol in eigen beheer vanne gemeindje te kriege. Dit mèt veurnaamste doel om 't kostebeheer mieër inne handj te hōbbe. Oppe lange door môtst dit gaon beteikene det beveurbieëltj de subsidies ane voetbalclub enne zaal in Neeritter precies net zoeë groeët waerdje as ane voetbalclub enne zaal in Èll. Gelieke monnikke, gelieke kappe en daodoor geldj bespare. Mer dit project heet toen zoeëveul geldj gekostj det de gemeindje Hunsel d'r bienao aan failliet ging. En waat leustj Ellske noe inne gezet? ... "Privatiseer verenigingne veur de fusie!" Dit sleit toch alles, ieërst wille ze alles nao zich haer trekke en noe wille ze euveral van aaf!

Vereiniginge môtte verhoeze.

'T veltj Ellske op det ederkieër det ze 't inne gemeindjeraod euver bouwplan Èll-noord hōbbe, det ze den kalle euver 't verplaatse vanne ponyclub, de sjötterrie enne vrachtwage parkieërplaats. 'T liektj d'r op det de Èller politieke men stróntj inne ouge hōbbe, want 't aafgeloupe jaor heet t'r, ein inkel oetzunjering daogelaote, geine eine vrachtwage geparkieërdj gestange. Dus hieëre, hiej kintj gae geldj oetspare.



Bouwóntwikkelinge in Èll.

Aafgeloupe jaor loos Ellske weer regemaotig verhaole inne gezet euver de bouwóntwikkelinge in Èll. Zoeë-as Ellske veurig jaor al veurspeldje is t'r op 1 juli gein sjöp inne gróndj gegange op Steenenbamp en óngertösse zeen

wae alweer mieër as ein half jaor verder en noch steeds is t'r niks gebeurtj. Mer wie Ellske dao op ein raodsvergadering ein opmerking euver maakdje waerdje door de politiek toegegaeve det det klopdje. Mer det ze noets haje gezagtj in welk jaor op 1 juli de sjöp inne gróndj zoeëj gaon. Dit zal waal ein politiek grepke zeen gewaestj want op dit moment zitte d'r bie de gemeindje ein aantal mèt de bille bie-ein. Tot noe toe heet 't allein mer geldj gekostj. 'Dit heet ein paar minse weer op ideeje gebrachtj want opins waerdje d'r euver ein noew bouwplan gesproke en waal in Èll-Noord. Mer weem dinktj det dit plan slummer is aangepaktj den 't plan op Steenenbamp dae heet 't good mis. Ouch hie liektj 't (as se de gezèt môtst geluive) net ein stopleecht: waal doorgaon-neet doorgaon ... Ofwaal, ein raodslid dae euver 't zieëbrapaad löptj: noe zeen ze mich waal, noe zeen ze mich neet ...

Stumme veur Leudal raod.

Ellske haaj zich toch waal veurgenómme om op Dorpebelang te stumme. Mer wie ze de gaele flyer inne henj kreeg, en dae ope vaogdje, sjrók ze waal zoeë erg van inkele van die gezichte, det ze toch mer op ein anger partje heet gestumpjtj.

Televisie kieke.

'T aafgeloupe jaor heet Ellske weer minder televisie gekeke. Neet det ze d'r geine tied mieër veur haaj en ouch neet det ze 't slechte programma's vindj. Nae, det is neet Ellske heur probleem. Mer waal det ze 't erg vervaelendj vindj det de reclameblokke steeds dèkker óngerbroke waere door soaps en films.

Ellske

Kritisch, sjerp en oplèttendj. Det is Ellske. Dees aoj tante duid op heur eige meneer verslaag van waat ze zoeë-al hie inne buurt heet gezeen of gehuërdj.



Politieke partjeje.

Neet allein de gemeindje geit fusere, ouch politieke partjeje doon det. Zoeë-as beveurbieëldj Kieërpuntj 92, die gaon op in Progressief Leudal. De liesttrèkker (of baeter gezagtj: liesttrèkster) van dees partje, Monique Hageman, liektj veur Ellske ein hieël slum vrouw. Mer dao is binne die partje eine mins dae dao mèt kop en sjouwer bove-oet stiktj.

Weegaanpassinge in Èll west

In mieërt van dit jaor waerdje de Antoniusstraot opgebroke ómdet dees volledig gerenoveertj môtst waere. Dit beteikendje noew riolering, eine stoep dae recht liktj en breier is en ein anger laog asfalt. Gelökkig veur Èll waerdje de Aoje Limburger dit jaor in Rooj gehaoje en môtst de weeg klaor zeen veur 1 juli, anges haaj d'r mesjien noe nog ope gelaeye. Want erg vlotte deej 't neet. Ze haje waal de aoj riolaansloetinge losgekoppeltj mer inne haost were ze op inkele plaatse vergaete om de

noew leijinge aan te sloete, zoeëdet dao al vrie snel 't tuuske euver leep. En ouch hōbbe ze van die henjigge weegversmalinge gemaaktj, dao bij Sjra van Stiene veur 't hoës. Det is toch waal effe winne as se van Rooj aaf kumpst. Ellske heet zelfs gehuërtj det emes van Èll, dae trök kwaam van 't kavele in Rooj, mèt de fiets tege die weegversmaling aanknaldje. En dea mins is dao neet met allein mèt kleijersjeure van aaf gekómme.





Waal of neet?

Nicol Orbon zitj bie Siem inne veróngerstelling det ter Bóntje Aovendj vergadering is. Siem wètj van niks, mer begós te twiefele nao 't verhaal van Nicol. Efkes later kumtj Mariëlle Beurskens binne, ouch veur diezelfde vergadering. Siem, nog mieër aan 't twiefele gebrachtj, begós mer alvast met 't klaorzette vanne steul. "Waal vreemdj det 't bestuur d'r nog neet is," waerdje hel-op gedachtj, dus ging Nicol Mart van Stiene mer ins belle óm te vraoge wie 't noe zaat. "Nae huër, gein vergadering," waerdje dudelik gemaaktj. "Siem, zèt de steul mer weer trök, wae höbbe ós vergistj" zegt Nicol, mèt ein roeëd gezicht.



Eikes zeuke.

Ron en Anita ginge mèt Tijn paos-eier zeuke vanne buurt. Dao ging 't de Ieërste Paosdaag óm half 11 nao de Prairie, mèt de tekening inne henj en ein mentje veur de eikes. Tieën minute later ging Anita heives óm innegang ouch weer trök te gaon nao de Prairie. Oeteindelijk óm 11 oor ginge ze weer mèt z'n drieje heives, mèt heur tekening en sónger de eikes. Koste ze gein eikes vinje? Waat bleek, 't zeuke vanne buurt waas neet de Ieërste mer de Twieëdje Paosdaag. Anita waas tóssedoor heives gegange óm nog ins op 't papeer te kieke en tot de ondèkking te kómme dèt ze zich vergistj haje.



Wisj djer al ...

- o det Stef op wereldjiedredaag oetlèk kreeg euver bieëste op sterk water
- o det Stef thoes kwaam en zag det 't neet erg zoj zeen as Sil (de hóndj) doeëd zoj gaon want hae geit noeës rosse.
- o det Wyb, de hóndj van Christa en Matje, strings hieël lekker vindj
- o det as hae de kans kriegtj, 't kruis droet bietj



Ein mupke



Nao ein hertoperatie zeet eine get aojere mins tege ziene dokter det zien vrouw noe bang waas voor seksueel contact, ómdet det ziene doeëd tot gevolg kost höbbe. Dae dokter verzekerde ziene patiënt det seks zeker gein kwaad kost. Dae mins waas dao blie óm en vroeg ane dokter hum ein sjriftelikke verklaring te gaeve. De dokter begost te sjriev en te sjriev en loos toen veur: "Geachte mevrouw Smit, de toestandj van deze man is zoeë oetzunjerlik good det 't mich neet zoj verbaze as hae op ein aovendj twieë of drie kieër zoj kinne prestere." Dae patiënt vónj det prachtig, mer vroeg dae dokter toch nog óm ein klein wieziging: "Kintj gae de naam Smit wèglaote?"

Waat ein sjaop



Marleen en Sjaak van Hover höbbe sjäöp. Op elf mei móst ein sjaop lame, mer dao blief se as goje boor neet de hieële tied biestaon. Ómdet 't aspergetied waas lepe d'r veul Pole op 't terrein rón dj. Op ein gegaeve moment kwaam Wioletta (zoeë haetj die Poolse vrouw) nao Sjaak haer geloupe, drök gebarendj mèt de bein wied en begintj hel te blèh-blèh-blèh-e. Sjaak snaptj drek waat se bedoeltj en löptj mèt nao 't barendje sjaop. Nao veul gedoons weurdj 't sjäöpke gebore, mer jaomergenóg laeft 't neet mieër. "Massieren, Massieren," reuptj die Poolse in 't Duits (?), "schnell ..." Mer Sjaak zeet det 't sjäöpke doeëd is. De Poolse paktj toch get struë en vriefjt 't bieëstje volop. En waat bliektj 't laeftj en is kerngezóndj! Later höbbe ze nog ein fles

Blèh .. blèh .. gaef mich gauw de fles
 want ich höb t'r hóngjer van gekrege.



advertentie

Wiltj gae
 noew tegelkes
 ane moor? En gae
 kintj det zelf neet doon?



Den nao Peter v.d. Eertwegh.

Zitj gae met de henj inne haor ?



Gaotj den nao SCISSORS & CO



Baeter laeze.

Matje, Siem en René Muysers ginge ónger heur drieje nao de WK-wêdstried Nederlandj-ivoorkust. Ze haje gein kaertjes, mer ein soort vouchers die ze nog bie 't stadion móste ómruile veur de toegangskaertjes. Ieërst de kroeg in en den zoeëje ze nog tied genóg hóbbe veur de entree. Ein kwarteer veur aanvang ginge ze richting stadion op zeuk nao 't wisselkantoeër veur de echte kaertjes. Aangekómme bie 't kantoeër waas 't volgendje te laeze 'Kaarte inwissele tot 19 oor.' Dae tied waas allang veurbie en 't kantoeër waas geslote. Dao stónge de drie heldje oet Èll, boete 't stadion mèt ónbroekbaar papeer inne tes. Oppe zwarte mertj wore ze veul geldj waerd gewaestj.



De wanjeltruuk.



Zoeëlang as de volleybalclub de wanjeltocht organiseertj, wanjelt Sjeng vanne bekker al mèt. Veurig jaor is det neet hieëlemaol good gegange. 'T lèste stök hóbbe ze aardig mèt hum mótte sleipe. Hae heet toen mèt zien dochter Esther aafgesproke det ze dit jaor mèt de wanjeling same zoje gaon koffiedrinke bie Lei van Geleuke. Sjeng guntj de volleybalclub ouch get en ging zich, veur det ze nao van Geleuke ginge, netjes insjrieve en betale. Loes van Palme zaat ane entree en zeet tege hum; "Sjeng, gae gaotj toch neet loupe?" "Jaowaal," zagt Sjeng. "Jao mèr, 't zeen 8 km, det is toch waal erg wiêt." Mer Sjeng zeet; "Ich gaon loupe!" Loes waerdje hie erg zenewechtig van en zeet tege Har van Duër (dae zich klaor aan 't make waas veur de wanjeling); "Lèt dich op Sjeng, en as t'r get is, bel mich mèr, den kóm ich hum drek hole." Óngertösse löptj Sjeng nao boete en staptj bie Esther inne auto. Ze rieje wèg en Esther zètj de auto bie de splitsing nieër en same loupe 't lèste stök tot bie van Geleuke. Ze drinke ein paar tasse koffie en aete ein lekker stök balkebie. Óngertösse kumtj Yvonne trök van 't wanjele bie de Prairie en vreugtj Loes aan Yvonne; "Höb se pap gezeen? Dae is allein 8 km gaon loupe!" "Nae," zeet Yvonne, "Neet gezeen ..." Bie van Geleuke troffe Esther en Sjeng Tjeu vanne Kerkhof, óngevieër van Sjeng ziene laeftied, dae ouch aan 't wanjele waas. Same ginge ze oppe foto, de twieë aodste wanjeliëers. Sjeng lieëtj zien kaart aafstempelen en ze gaon trök nao de Prairie óm zich aaf te meldje en nog ein pilske te pakke. Loes waas t'r óngertösse ouch achter det Sjeng neet zoeë wiet geloupe haaj.



advertentie



Kinjer

Dionne van Ard van Roy zaat mèt de familie inne aovendjmès. Ze zitj naeve tante Christianne en begintj hevig te zweie en reuptj: "Hey...Hey...Hey..." "Zuus se eine bekindje?," vreugtj Christianne. "Jao..Jao... dao.. JEZUS!"

KEPPER

Clown
Goocheliëer
Artiest
Fratsemaker
En nog völ mieër



Veur alles
waat mèt bloomstökskes
te make heet




Don en Ilze vd. Winkel
kinne d'r uch aan helpe



Waal wèg ... neet wèg ?




Tonny Cuijpers waerdje oetgezónje nao Afghanistan en zien vrinj, de Prutsers, vónje det de meute waerd óm veur deze kameraod ein fieëstje te organiseren. Hae ging veur 5 maondj wèg en hae móst t'r dus lang op tere. Ederein waas oetgenuëtj en 't waas stampdrök. Danique haaj ein leedje veur hum gemaaktj en det waerdje oet volle borst door ederein mèt gezónge. Hae kreeg ouch nog ein plekbook woeë-in völ foto's en spannendje verhaole staon die hae en



zien vrinj same hóbbe mètgemaaktj. Zoeë heet t'r in dae tied get óm op trök te kieke en vergitj tjer nemes. De hieële aovendj is t'r gedrónke ónger 't motto van Tonny: "Drink beer want cola is slecht veur dien tenj!" De dónderdig nao 't fieëst zoj Tonny vertrèkke. Mèr dit waerdje mèt gein opgaaf van reje oetgestèldj tot ein waek later. Ein waek later waas 't zoeë wiêt, mer de verbazing waas groeët toen Tonny maondjig aovendj weer thoes waas. Ze waore gestrandj in Turkeye en koste neet verder omdet ????? Ze waerdje dao opgevange in ein good hotel en hóbbe nog effe genote van ein waal hieël korte verkansie. Op dinsdig waas 't den echt zoeë wiêt en is Tonny vertrokke en ouch good aangekómme in Afghanistan. Wae vanne redaktie hóbbe gehuërdj det zien vrinj ein nog groeëter fieëst gaeve euver 5 maondj, want ze zeen allemaol blie as Tonny weer trök is. Ze zegge; "zónger Tonny zeen wae neet complieët."



De Kwakel



Tersjelling.

Eder jaor gaon Ed, Carla, Matje, Christa enne kinjer nao Tersjelling op vekansie. Ze gaon den vèsse bie paol 8. Christa enne kinjer mèt de bös en die anger mèt de fiets. Carla sluttj dao aangekómme heure fiets aaf en lèktj de sleutel inne stavel van Jur. Matje ging nog ièerst pirke hole mer hae is de fietsesleutel kwièt en löptj trök nao de bös. Dao vindj tjer de sleutel inne stavel van Jur. Nao eine daag vèsse, ze haje eine zieëbaars en eine platvès gevange, ginge ze heives. Christa mèt de bös en de rest mèt de fiets. Noe waas Carla de sleutel kwièt, mer ze kreeg dae van Matje. Matje dinktj det ziene sleutel op 't strandj liktj en briketj zien sloot ope. De volgendje daag loupe Carla en Christa euver 't strandj en zègge, as ich hie eine sleutel zoj vinje den lagt ich dae hie op det pälke nieër! En werkelijk ... dao laag dae sleutel! "Jèh," zeet Christa, "dae sleutel kinne wae net zoeë good inne zieë goeëje want det gluiftj Matje ós noeëts.



PAOL
8

Ein mupke

Ein vrouw van tachtig waerdje gearresteerdj veur winkeldiefstal. Wie ze veur de rechter stóng vroeg dae: "Waat höbtj gae eigelik gestole mevrouw?" "Ein blik pese menieër," antjwoordje die vrouw netjes. Toen dae rechter vroeg woeërom ze det gedaon haaj, zagt ze det ze honger haaj. De rechter vroeg ouch nog: "Wieveul pese zote d'r in det blik?" "Zès," gaaf ze as antjwoord. "Den gaef ich uch 6 daag gevangenisstraf," zeet dae rechter toen. In eine kieër steit dae mins van die vrouw op en vroeg belaeftj of t'r ouch get mocht zègge. "Det is good," zeet dae rechter, "zèktj 't mer." Toen zeet dae mins: "Ze heet ouch nog ein blik erte




Vleis of blome of ... allebei ?

Juffrouw Nellie vanne sjoël kumtj vleis hole bie de slegter. José van Vlerke is heur aan 't helpe. Effe tösse door vreugt Nellie aan Marleen van Ruud om 2 bloomstökke te bestèlle. Marleen begintj oet te lègge dèt de bloomstökke, die de winkel en etalage sjoëen versere, neet te koup zeen. Nellie is al de zoeëveulste klantj dae óm die bloomstökke vreugtj..... Marleen kumtj tjer den toch zelf achter dèt juffrouw Nellie mèt bloomstök neet de blome, mer 't vleis bedoeltj (ein soort rosbeef).



Opgeruumdj steit netjes.

De familie Ter Tholen ging weer ins mèt de vouwwage ein weekend droet. Ze ginge nao de Ardenne veur ein korte vekantie. Helaas waas de vouwwage neet mieër in bèste staot en óngerweeg ging 't kerke kapot. Hans besloot langs de weeg te stoppe en leet 't geval staon óm ederein ièerst nao de plaats van bestumming te bringe. Dao aangekómme zagt ein broor van Hans tege hum; "Je laat dat wagentje toch gewoon achter, maar ik zou wel eerst even de bruikbare spullen eruit halen." Zoeë gezagd, zoeë gedaon. Hans ging trök en heet veur de zekerheid ouch de rajer d'r aaf gehoordj, zoeëdet nemes mèt det geval de weeg op kost gaon. Later bleek det kerke toch wèg ... en wie de Belsje Gendarmerie 't dink heet opgeruumdj is ein raodsel.



Get ièerder heives.

May en Jos ginge nao ein fieëst bie Paula en Cleo. May ging get vreuger heives en op 't Meuleveldj aangekómme waas ze de weeg kwiët. Ze oriëteerdje zich oppe kirk en nao veul zweite en zuchte kwaam ze ein oor later thoes, kei kepot en net veur Jos. Mer good want dae haaj geine sleutel bie zich ... May ging toch vreug heives! May zeet det ze mer 3 glaeskes wiën haaj gedronke en as May det zeet den is det zoeë.



advertentie

Mèt eine caravan droet;
waer of gein waer?
Den mójtj gae nao
Lantinga haer.



Ouch veur eine camper

VAKLAN

Mót eure
auto weer
fit door
alle waer?



Gaotj nao
Garage
Heemels
haer.

Wiltj gae ein plentje veur inne
tuin of gewuën goje raod ?



Den gouv nao Stals
oppe Hoeëgstraot.




Weurdje vanne redaktie

'T waas weer passe en maete óm d'r alles in te kriege. Gae höbtj waal gemerketj det De Kwakel dit jaor get dieker is. Rianne is ós kómme versterke en dao zeen wae blie mèt. De rubriek 'zeuk de 11 versjille' op bladzij 12 is t'r bie gekómme. Veul plezeer mèt laeze en puzzele!

De Kwakel is ein oetgave van 't Kwakelcomité;
Thea van Beurskes, Jeanny vanne Kaolder, Corry van Pleunis, Hub vanne Baars, Rianne Goldenbeld en Paul van Miet



Mèt dank aan;
Tjeu van Lemme en Huub Sentjens



Ein 'kleidkamer' verhaol.




Ana van Paul van Miet poetstj noe al lange tied de kleidlokale van ós voetbalclub. Gemiddeldj gezeen: waat ze nao traininge en wêdstrije oeëts aantrefjt hêltj ein bietje 't midde tösse 'sjoëen opgeruumdj' en 'eine verkestal'. Det heet nateurlik veul te make mèt 't waer, mer ouch veur ein groeët gedeiltje mèt de inzèt vanne leiders / trainers. Veurig jaor , nao de mèt 5-1 gewónne wêdstried van 't ieerste tege RKSVM oet Naer, ging ze 's maondjigs weer poetse. Waat ze dao toen aantrof heet heur ein oor extra gekostj! Ze móst heur frustratie kwiët en beldje Paul op 't werk op; "Neet te geluive det minse det zoeë kinne achterlaote, waardeloos det t'r neet eine bie is dae den effe 't meiste opruumdj, etc, etc, .." Paul huêrdje det mer weer aan en beloofdje d'r inne bestuursvergadering veur de zoeëveulste kieër get van te zègge.

's Aoves, wie alles ein bietje gezaktj waas, zag Jordi det emes oet Maasbracht gebeldj haaj, mer dae zoj trök belle. "Oh," zeet Paul, "det is missjien dae vader van Marc van Bommel dae ouch get Spaanse les bie dich wiltj volge!" Mer Marc voetbaltj neet mieër in Barcelona, dus det laag neet zoeë veur de handj. Later ging weer dae telefoon en Ana noom zelf op. Ze kost d'r ieerst gein touw aan vast knuipe waat dae mins allemaol zag, mer nao get verder kalle veel 't kwartje. 'T waas de trainer van Èll in hoeëgst eige persoeën. Hae haaj nao veurzitter Jos van Lemme gebeldj óm zien veróntsjoëdiginge aan te beje vanwege die vètzooj in det kleidlokaal. De trainer haaj de speulers beloofjt det hae de kleidlokale zoj poetse nao eine gewónne wêdstriêd. Mer naodet t'r effe inne kantine haaj gezaete waas t'r dit vergaete. Dus woeëj d'r zich op dees meneer daoveur excuzere. Jos haaj gezagdj det t'r den neet bie hum móst zeen, mer bie Ana. Det waas dus waal netjes!



Hub verkieërtj verbónje.


't Waas zunjig aovendj bie de Prairie en Hub haaj al de nuëdige Grimbergen gatj. Luuk (van Kelpen) waas zoeë rón dj ein oor of tieën klaor mèt wirke en ging d'r zich ouch eine drinke. Hae kwaam zoeë mèt Hub ane kal en Hub vónj det Luuk toch óngerhandj waal ins heives móst gaon. Luuk vónj det nog neet nuëdig. Hub zagt toen det t'r José waal ins effe zoeëj belle. Dit vónj Luuk prima, allein goof Luuk neet 't nummer van hum thoës, mer det vanne mobiele van Pallie (Pascal Beurskens). Hub beltj dus det nummer en dinktj det



hae José ane telefoon heet, mer heet neet inne gate det Luuk mèt Pallie ziene mobiele nao de wc is geloupe. José (Luuk dus) zeet det Luuk mer heives mót kómme. Luuk kumtj trök vanne wc en Hub zeet det t'r mer heives mót gaon ómdet José det heet gezagdj. De volgendje daag vónj Hub det t'r hieëlemaol neet zaat waas gewaestj want hae wist good det t'r Sé van Miet ane telefoon haaj gatj.



Eine mins probeerdje al ich weit neet wie lang nao de ober te winke, mer dae reageerdje neet. Oeteindelik waas t'r 't meug. Hij sting op en sjrieëwdje: "Ich wil nog ein tas tieë!" Toen kwaam dae ober kwaod nao hum haer. "Gae hoofftj neet zoeë te sjrieëwe huër. Ich bèn neet douf," zagt t'r. "Num mich neet kwaolik," zeet dae mins toen. "Det waas neet netjes van mich." "Det is al good," zeet dae ober. "Waat wiltj gae ouch alweer inne koffie ...?"



Harry vertèldj ane bar:


Ich waas bienao veróngelóktj inne zeiktón. Wie det ich trouwdje hób ich Annie beloofjt 'tot de dood ons scheidt'. Noe waas ich bienao 'gedood door de schijt'.

Ich waerdje aangehaoje door de plies en ómdet ich van allerlei gereidsjap bie mich haaj dacht de plies det ich missjien waal eine inbraeker waas. "Jèh," zag ich toen, "den kan ich ouch eine verkrachter zeen want det gereidsjap hób ich ouch bie mich!"



Ein mupke

advertentie



Ein plank hie en ein letje dao. Laotj aanein tummere euver aan

Wim Steuten
Tummerwirke



Gein gèldj mieër inne tes mèt dees daag. Loup den mer bie de Rabobank nao binne. Want dao kins se daag en nacht pinne.

Höbtj gae kabelwerk ?

van Geleuken is den sterk



Jos inne kreukels.



Jos van Lemme heet 't aageloupe jaor drie kieër de autoverzekering mótte insjakele. De ieërste kieër stóng d'r bie de IKEA in Indjehove boete mèt 'ne houp kest en bédde. Waat bleek? Intösse det hae aan 't




winkele waas haje ze zien aanhangkerke gestole. De pliesie waerdje d'r bie gehooltj en oppe bewakingscamera's waas dudelik te zeen wie det aanhangkerke waerdje aafgekoppeltj en ouch 't kinteiken vanne deef waas goot te zeen. De pliesie ging d'r neet drek achteraan, mer IKEA haaj compassie mèt Jos en hae kreeg gratis ein IKEA-kerke mèt,

det t'r later waal weer trök móst bringe. De deef is later opgepaktj, mer 't kerke waas al doorverkochtj dus dit waerdje al deur kest.

De twieëdje kieër waas Jos örges in Panninge de weeg aan 't zeuke en lédje neet good op. Hae reej toen achter op eine angere auto dae veur hem stil stóng. Gevolg: auto 'total loss'.

De derde kieër, nog gein zès waeke later, op eine vriedigmiddig riedj Jos langs de kantine vanne voetbalclub óm nog get toete ships te pakke óm ane jeugdvoetballers mèt te gaeve. Die ginge de volgendje daag in Amsterdam oppe Dam de finale straatvoetbal speule. Wie det t'r ane kirkhoof kumtj langsrieje zoot t'r Fred van Heijkers inne hoof wirke. Hae dreijt alvast 't raam ope óm op hum te rope det t'r ein aantal toete ships inne auto heet ligge. En of Fred die names de voetbalclub wiltj mèt numme. In zien enthousiasme begintj tjer al de Scheijvestraat in te dreie mer zoot daobie 'ne tegeligger vanoet Hunsel euver de kop. Hae knaldje d'r zoeëhel op det t'r daodoor vol achteroet inne hék vanne kirkhoof vloog. Hae kost nog blie zeen det det ein stevig hék is, anges waas t'r ouch nog in ein gaat terecht gekómme.

Vanne verzekering heet hae ein groeët kerstpakket gekrege. Det zaat t'r waal aan nao zoeëveul premieverhuëginge in ein jaor tied.




Verdacht aafschrift.

Arjan van Vlerke duit thoes ziene administratie en kiekjt de aafschrifte vanne bank nao. Hae vreugtj aan José (zien vrouw) wannieër ze gepintj heet bie Siem. José verklaortj neet bie Siem te kómme en volges heur kin se dao gaaroot neet pinne. Nao lang vieve en zèsse kómme ze d'r achter det José aetbónne haaj gekochtj in Nejewieërt "biej Siem".



Ein (te) klein brevebös.



Mariëlle van Jantje van Beurskens haaj zwarte pruke gelieëndj van Christianne van Roy en woeëj die veur 5 december nog effe trök bringe. Aafgesproke waerdje det as Christianne neet thoes waas, ze ze gewuën door de brevebös

zoj duje. Mariëlle heet staon hannisse, mer de pruke ginge d'r neet door. Toen heet ze de pruke nao Mia gebrachtj en mer gewuën aangebeldj en aafgegave. Twieë daag later móst de paol van 't paoldanse ouch trökgebrachtj waere. Wae gluive det ze dae ouch mer gewuën achteróm gebrachtj hóbbe.



Wisj djer al ...

- o det eine jónge kaerel oppe Jasmijnstraot nog ein vlotte sjoënmoder zeuktj die zich nörges mèt bemeutj
- o det as ze in 't bezit is van ein leuke vriegezelle dochter, det gein bezwaor is



- o det Maud ging koke en det in det recept twieë teentjes knoflouw móste
- o det Maud twieë böi knoflouw haaj gebroektj
- o det dae knoflouw toen door de porië droet kwaam
- o det Ruud van Hover altied alles 't bèste wètj
- o det hae meintj det t'r ouch hieël good auto kan rieje
- o det Lambèr hum det al heet vertèldj veurdet t'r kós loupe
- o det t'r mèt starte altied de voot oppe koppeling móst haoje
- o det Ruud de auto stardje (dae inne achteroet sting), mer de veut boete de auto haaj
- o det dae auto innegang trök reej tege de mèstspreier aan en toen de roët droet vloog
- o det dit spannendje verhaol noe aaf is
- o det JWE veurig jaor eine aovendj haaj veur allein de maedjes
- o det de aktiviteite paoldanse en bakke wore
- o det wie ze 3 waofeliezere en eine waterkoker aan haje staon de zekering droet vloog
- o det toen Jan van Vosse opgetrómeltj waerdje óm de zaak te reparere
- o det die meide toch weer eine man nuëdig haje óm de aovendj door te kómme



- o det Ton van Gerris oppe verjaor daag van Sjeng achter de tap sting
- o det t'r ein fles wiën mèt sjroefdop ope woeëj make mèt de kurketrèkker
- o det Siem reclame haaj gezeen euver pilkes veur soepel gewrichte
- o det Corine die móst gaon hole mer bie heur eige dacht; "missjien kin se baeter gaon sporte."
- o det Siem toen helop zagt; "ich kan missjien ouch gaon sporte (..), mer jeh, ein pilke per daag is toch gemèkkeliker."



De Kwakel

PROKLAMATIE VAN JEUGDPRINS REMKO EN JEUGDPRINSES CAROLIEN

Wae,
Jeugdprins Remko



Zoon van Henk en Annelies
Broor van Jolien en Kristel
Van voetballer bie RKESV
Tot spelletjes-fanaat achter de PC

En
Jeugdprinses Carolien



Dochter van Rob en Resian
Zös van Judith
Op miene PC allein veur MSN en muziek
Want det vinj ich allebei herstikke sjiek

Wae laote alle Moeëre en Moeërinne wete det:

Ten iëerste:

R: Ich vandaag get hób te vere, want ich maag euver de Moeërebuuk regere.

Ten derdje:

R: Det Mitch en Jolien 't good hóbbe gedaon, ze kieke den ouch hieël voldaan.

Ten vijfde:


R: 'T zal neet lang mieër dore, veurdet ze 't "Jeugd-prinsebord" weer bie ós de grondj in bore.

Ten zevendje:

R: Ouch zónger computer en TV, luiptj 't dees daag neet inne puree.

Ten negendje:

R: Dootj allemaol mèt, den hove wae nog neet nao bèd.



Ten elfdje:

Same R+C: Wae same met de jeugdraod en ós adjudante d'r veur zulle wake, det wae d'r gezellige daag van gaon make.



En dit alles ónger ós motto:

BOEM PAAF, WAE KNALLE OPPE VASTE LAOVENDJ AAF !!



advertentie

advertentie


advertentie

Veur appele en paere
Gaotj nao Moors-Franssen



vers vanne boum

Is eure
computer
of printer
d'r meug
aan ?



James Brennand kriegtj
det weer aange gang

Inne kasse van Coolen
kin djer kómkommers hole





IN 'T VASTELAOVENDJ IN 'T MOEËRELANDJ

www.moerebuuk.nl



Winnendj leedje Leedjesaovendj 2006-2007




Van: Jeugdcomité
Titel: **Wie ein Vèske in 't Water**



REFREIN

Veul mich wie ein vèske in 't water
In 't vastelaoves-geklater
Kumtj de vastelaovendj
Den geit alles aanne kantj
Gaon drie daag köpke ónger in ós Èller
moeërelandj
Den hób ich al die daag gooj zin
Duik de vastelaovendj in



1e couplet

Wae duike drie daag ónger
Det bevèltj ós hieël erg good
Drinke danse zinge
Höbbe echt veul goje mood.
Die daag zeen echt neet saai
Vastelaovendj meuktj ós HAAI

Refrein

2e couplet

Ós huid is net as sjubbe
Die versjuutj den van kleur
Draag duikbril of get vlumme
Is t'r drie daag gein gezeur
'T zeen de daag van lol en gein
Vastelaovendj is DOLFEIN

Refrein

3e couplet

Drie daag is get te kort
Veur 't sjoëenste fieëst van 't jaor
De allerlèste daag
Veltj ós den ouch zwaor
Kómme wae weer bove water
Veultj det wie eine KATER

Refrein

